

四庫全書

集部

欽定四庫全書

集部

宋文紀卷二

詳校官庶吉士_臣瑚圖禮

主事銜_臣徐以坤覆勘

總校官進士_臣楊懋珩

校對官中書_臣李斯咏

謄錄舉人_臣薛炳文

欽定四庫全書

宋文紀卷二

明 梅鼎祚 編

文帝

名義隆小字車兒武帝第三子初封宜都王少帝廢徐羨之等迎立

在位三十年為太子
勅所執廟號太祖江
左之治稱元嘉焉

答羣臣勸進令

文帝初封宜都王為湘州刺史景平二年七月少帝廢奉迎入

奉皇統行臺至江陵侍中臣琇
等上表勸進王令答八月即位

皇運艱弊數鍾屯夷仰惟崇基感尋國故永慕厥躬悲

慨交集賴七百祚永朕肱忠賢故能休否以泰天人式

序猥以不德謬降大命顧已兢悸何以克堪輒當暫歸
朝廷展哀陵寢并與賢彥申寫所懷望體其心勿為辭
費

侍中臣琇散騎常侍臣嶷之中書監尚書令護
軍將軍建城縣公臣亮左衛將軍臣景仁給事
中游擊將軍龍鄉縣侯臣隆越騎校尉都亭侯
臣綱給事黃門侍郎臣孔璩之散騎侍郎臣劉
思考員外散騎侍郎臣潘盛中書侍郎臣何尚

之羽林監封陽縣開國侯臣蕭思話長兼尚書
左丞德陽縣侯臣孫康吏部郎中騎都尉臣張
茂度儀曹郎中臣徐長琳倉部郎中臣庾俊之
都官郎中臣袁洵等勸進表

臣聞否泰相革數窮則變天道所以不諂卜世所以靈
長乃者運距陵夷王室艱晦九服之命靡所適歸高祖
之業將墜于地賴基厚德深人神同獎社稷以寧有生
獲又伏惟陛下君德自然聖明在御孝悌著於家邦風

猷宣於蕃牧是以徵祥雜沓符瑞燿輝宗廟神靈乃騰
西顧萬邦黎獻望景託生臣等忝荷朝列豫充將命復
集休明之運再覩太平之業行臺至止瞻望城闕不勝
喜悅鳬藻之情謹詣門拜表以聞

訊刑詔

太祖卽阼有司奏車駕
依舊臨華林園聽詔曰

政刑多所未悉可如先二公推訊

大使巡行四方詔

元嘉三
年二月

夫哲王宰世廣達四聰猶巡獄省方採風觀政所以情

偽必審幽遐固滯王澤無擁九臯有聞者也朕以寡薄
猥纘洪緒雖永念治道志存昧旦願言傳巖發想宵寐
而丘園之秀藏器未臻物情民隱尚隔視聽乃眷區域
輟寢忘飧今氛祲驅蕩宇內寧晏旌賢弘化於是乎始
可遣大使巡行四方其宰守稱職之良閭閻一介之善
詳悉列奏勿或有遺若刑獄不卹政治乖謬傷民害教
者具以事聞其高年鰥寡幼孤六疾不能自存者可與
郡縣優量賑給博採輿誦廣納嘉謀務盡銜命之旨俾

若朕親覽焉

同前

裴松之傳云元嘉三年誅司徒徐羨之等分遣大使巡行天下松之為國子博士及

袁滄等十餘人並兼散騎常侍班宣詔書

昔王者巡功羣后述職不然則有存省之禮聘類之規所以觀民立政命事考績上下偕通遐邇咸被故能功昭長世道歷遠年朕以寡闇屬承洪業寅畏在位昧于治道夕惕惟憂如臨淵谷懼國俗陵頽民風凋偽菁厲違和水旱傷業雖勤躬庶事思弘攸宜而機務惟殷顧

循多闕政刑乖謬未獲具聞宣誠素弗孚使羣心莫盡
納隍之愧在予一人以歲時多難王道未一卜征之禮
廢而未修眷彼氓庶無忘欽卹今使兼散騎常侍渝等
申令四方周行郡邑親見刺史二千石官長申述至誠
廣詢治要觀察吏政訪求民隱旌舉操行存問所疾禮
俗得失一依周典每各為書還具條奏俾朕昭然若親
覽焉大夫君子其各悉心敬事無惰乃力其有咨謀遠
圖謹言中誠陳之使者無或隱遺方將敬納良規以補

其闕勉哉勗之稱朕意焉

丹徒蠲租詔

四年二月行幸丹徒謁京陵三月詔

丹徒桑梓綢繆大業攸始踐境永懷觸念罔極昔漢章南巡加恩元氏況情義二三有兼曩日思播遺澤酬慰士民其蠲此縣今年租布五歲刑以下皆悉原遣登城三戰及大將家隨宜隱卹

災戒求言詔

五年正月

朕恭承洪業臨饗四海風化未弘治道多昧求之人事

鑒寐惟憂加頃陰陽違序旱疫成患仰惟災戒責深在
予思所以側身剋念議獄詳刑上答天譴下恤民瘼羣
后百司其各獻讜言指陳得失勿有所諱

經理河南詔

太祖踐阼便有志北略元嘉七年三月下詔遣使告魏主燾河南舊

是宋土今當修復不闕河北長沙王義欣出鎮彭城總統羣帥

河南中國多故湮沒非所遺黎茶炭每用矜懷今民和
年豐方隅無事宜時經理以固疆場可簡甲卒五萬給
右將軍到彥之統安北將軍王仲德兖州刺史竺靈秀

舟師入河驍騎將軍段宏精騎八千直指虎牢豫州刺史劉德武勁勇一萬以相掎角後將軍長沙王義欣可權假節率見力三萬監征討諸軍事便速備辦月內悉發

申務節儉詔

八年三月

自項軍役殷興國用增廣資儲不給百度尚繁宜存簡約以應事實內外可通共詳思務令節儉

勸農詔

八年閏六月

自頃農桑惰業遊食者衆荒萊不闢督課無聞一時水旱便有罄匱不深存務本豐給靡因郡守賦政方畿縣宰親民之主宜思獎訓導以良規咸使肆力地無遺利耕蠶樹藝各盡其力若有力田殊衆歲竟條名列上

遣使益梁交廣詔

九年六月

益梁交廣境域幽遐治宜物情或多偏擁可更遣大使巡求民瘼

內外薦舉詔

十二年四月

周宗以寧實由多士漢室之隆亦資得人朕寤寐樂賢
為日已久而俊哲難階明揚莫効用令遺才在野管庫
虛朝永懷前載慚德深矣夫舉爾所知宣尼之篤訓貢
士任官先代之成准便可宣敕內外各有薦舉當依方
銓引以觀厥用

優減租役詔

十七年十一月

前所給揚南徐二州百姓田糧種子充兩豫青徐諸州
比年所寬租穀應督入者悉除半今半有不收處都原

之凡諸逋債優量申減又州郡估稅所在市調多有煩
刻山澤之利猶或禁斷役召之品遂及稚弱諸如此類
傷治害民自今咸依法令務盡優允如有不便即依事
別言不得苟趣一時以乖隱卹之旨主者明加宣下稱
朕意焉

建學詔

十九年
正月

夫所因者本聖哲之遠教本立化成黜學之為貴故詔
以三德崇以四術用能納諸義方致之軌度盛王祖世

咸必由之永初受命憲章弘遠將陶鈞庶品混一殊風
有詔典司大啓庠序而頻邁屯夷未及修建永瞻前猷
思敷鴻烈今方隅乂寧戎夏慕嚮廣訓胄子實惟時務
便可式遵成規闡揚景業

崇奉孔聖詔

十九年
十二月

胄子始集學業方興自微言泯絕逝將千祀感事思人
意有慨然奉聖之脩可速議繼襲於先廟地特為營造
依舊給祠直令四時饗祀闕里往經冠亂鬻校殘毀并

下魯郡修復學舍採召生徒昔之賢哲及一介之善猶
或衛其丘壟禁其芻牧况尼父德表生民功被百代而
墳塋荒蕪荆棘弗剪可蠲墓側數戶以掌洒掃魯郡上
民孔景等五戶居近孔子墓側蠲其課役供給洒掃并
種松栢六百株

籍田詔

二十年
十二月

國以民為本民以食為天故一夫輟稼飢者必及倉廩
既實禮節以興自頃在所貧罄家無宿積賦役暫偏則

人懷愁墊歲或不稔而病乏比室誠由政德弗孚以臻
斯弊抑亦耕桑未廣地利多遺宰守微化導之方萌庶
忘勤分之義永言弘濟明發載懷雖制令亟下終莫懲
勸而坐望滋殖庸可致乎有司其班宣舊條務盡敦課
遊食之徒咸令附業考覈勤惰行其誅賞觀察能殿嚴
加黜陟古者躬耕帝籍敬供粢盛仰瞻前王思遵令典
便可量處千畝考卜元辰朕當親率百辟致禮郊甸庶
幾誠素將被斯民

霖雨周給詔

二十一
年六月

霖雨彌日水潦為患百姓積儉易致乏匱二縣官長及營署部司各隨統檢實給其柴米必使周悉

督種麥詔

二十一
年七月

比年穀稼傷損淫亢成災亦由播殖之宜尚有未盡南徐兗豫及揚州浙江西屬郡自今悉督種麥以助闕乏速運彭城下邳郡見種委刺史貸給徐豫土多稻田而民間專務陸作可符二鎮履行舊陂相率修立并課墾

聞使及來年凡諸州郡皆令盡勤地利勸導播殖蠶桑
麻紵各盡其方不得但奉行公文而已

策試賜帛詔

二十三年九月車駕幸國子學策試諸生十月下詔

庠序興立累載胄子肄業有成近親策試覩濟濟之美
緬想洙泗永懷在昔諸生答問多可採覽教授之官並
宜沾賚賜帛各有差

詔羣臣

二十三年魏寇兗青徐三州遂及清河殺掠甚衆太祖思弘經畧詔羣臣

吾少覽篇籍頗愛文義游玄翫采未能息卷自纓紉世

務情兼家國徒存日昃終有慙德而區宇未一師僅代
有永言斯瘼彌于其慮加疲疾稍增志隨時往屬思之
功與事而廢殘虐游魂齊民塗炭乃眷北顧無忘弘拯
思摠羣謀掃清逋逆感慨之來遂成短韻卿等體國情
深亦當義篤其懷也詩曰季父鑒禍先辛生識機始崇
替非無徵興廢要有以自昔淪中畿儵焉盈百祀不覩
南雲陰但見北風起亂極治必形塗炭由積否方欲滌
遺氛矧乃穢邊鄙眷言悼斯民納隍良在已逝將振宏

羅一麾同文軌時乎豈再來河清難久俟駘駟安局步
騏驎志千里梁傳畜義心伊相抱深恥賞契將誰寄要
之二三子無令齊晉朝取愧鄒魯士

賜京邑二縣詔

二十五
年正月

比者冰雪經旬薪粒貴踊貧弊之室多有窘罄可檢行
京邑二縣及營署賜以柴米

講武詔

二十五
年二月

安不忘危經世之所同治兵教戰有國之恒典故服訓

明恥然後少長知禁頃戎政雖修而號令未審今宣武場始成便可尅日大習衆軍當因校獵肄武講事

謁京陵大赦普加贍卹詔

二十六年二月幸丹徒謁京陵三月五月

並下

詔

朕違北京二十餘載雖云密邇瞻塗莫從今因四表無塵時和歲稔復獲拜奉舊塋展罔極之思饗讌故老申追遠之懷固以義兼於桑梓情加於過沛永言慷慨慰實深宜聿宣仁惠覃被率土其大赦天下復丹徒縣

僑舊今歲租布之半行所經縣蠲田租之半二千石官
長並勤勞王務宜有沾錫登城三戰及大將戰亡墜沒
之家老病單弱者普加贍卹

募移京口詔

二十六
年三月

京口肇祥自古著符近代衿帶江山表裏華甸經塗四
達利盡淮海城邑高明土風淳壹苞摠形勝實唯名都
故能光宅靈心克昌帝業頃年岳牧遷回軍民徙散塵
里廬宇不逮往日皇基舊鄉地兼藩重宜令殷阜式崇

形望可募諸州樂移者數千家給以田宅并蠲復

丹徒存卹故舊詔

二十六
年五月

吾生於此城及廬循肆亂害流茲境先帝以桑梓根本
實同休戚復以蒙雅猥同艱難情義繾綣夷險兼備舊
物遺蹤猶存心目歲月不居逝踰三紀時人故老與運
零落眷惟既往倍深感嘆可搜訪于時士庶文武今尚
存者具以名聞人身已亡而子孫見在優量賜賚之

零
太

平御覽
作遷

亂後撫民詔

卷二
二十七年七月寧朔將軍王元護北伐攻滑臺不克為魏所敗諸將

多被殺明年二月
自盱眙退還下詔

獬豸孔熾難及數州瞋言念之寤寐興悼凶羯痍挫迸
跡遠奔彫傷之民宜時振理凡遭寇賊郡縣令還復居
業封屍掩骼賑贍飢流東作方始務盡勸課貸給之宜
事從優厚其流寓江淮者並聽即屬并蠲復租調

大舉北討詔

元嘉二十七年魏主燾率眾寇汝南攻圍懸瓠虜掠甚多其年大舉

北討

敵近雖摧挫獸心靡革驅逼遺氓復規竊暴比得河朔
秦雍華戎表疏歸譁困棘跂望綏拯潛相糾結以候王
師并陳芮芮此春因其來掠掩襲巢窟種落畜牧所亡
大半連歲相持于今未解又猜虐互發親黨誅殘根本
危敝自相殘殄芮芮間使適至所說並符遠輸誠款誓
為掎角遐邇注情既宜赴獎且水雨豐澍舟楫流通經
略之會實在茲日可遣寧朔將軍王元謨率太子步兵
校尉沈慶之鎮軍諮議叅軍申坦等戈船一萬前驅入

河使持節督青冀幽三州徐州之東安東莞二郡諸軍
事輔國將軍青冀二州刺史霄城侯蕭斌推三齊之鋒
為之統帥持節都督徐兗青冀幽五州豫州之梁郡諸
軍事鎮軍將軍徐兗二州刺史武陵王駿摠四州之衆
水陸並驅太子左衛率始興縣五等侯臧質勒東宮禁
兵統驍騎將軍安復縣開國侯王方回建武將軍安蠻
司馬新康縣開國男劉康祖右軍參軍事梁坦步騎十
萬逕造許洛使持節督豫司雍秦并五州諸軍事右將

軍豫州刺史領安蠻校尉南平王鏐悉荆河之師方軌
繼進東西齊舉宜有董一使持節侍中都督揚南徐二
州諸軍事太尉領司徒錄尚書太子太傅國子祭酒江
夏王義恭德望兼崇風略遐被即可三府文武并被以
中儀精卒出次徐方為衆軍節度別府司空府使所督
諸鎮各遣虎旅數道爭先督梁南北秦三州諸將事綏
遠將軍西戎校尉梁南北秦三州刺史秀之統輔國將
軍楊文德宣武將軍巴西梓潼二郡太守劉宗宏連旗

深入震盪沂隴護軍將軍封陽縣開國侯蕭思話部龍驤將軍支坦寧遠將軍竟陵太守南陵縣開國侯劉德願籍荆雍之勁攬羣師之銳宜由武關稜威震滂指授之宜委司空義宣議量

優卹六州詔

二十九年正月

經寇六州居業未能仍值災澇飢困荐臻可速符諸鎮優量救卹今農事行興務盡地利若須田種隨宜給之

酬獎河朔歸義詔

二十九年五月

惡稔身滅戎醜常數敵人窮凶著于自昔未勞資斧已
伏天誅子孫相殘親黨離貳關洛偽帥並懷內款河朔
遺民注誠請効拯溺蕩穢今其會也可符驃騎司空二
府各部分所統東西應接歸義建績者隨勞酬獎

長沙王道憐等配饗太廟詔

道憐高祖中弟從
戰有功元嘉九年

詔

古者明王經國司勲有典平章以馭德刑班瑞以疇功
烈銘徽庸于鼎彝配祫祀于清廟是以從饗先王義存

商誥祭于大蒸禮著周典自漢迄晉世崇其文王猷既
昭幽顯咸秩先王經緯天地撥亂受終駿命爰集光宅
區宇雖聖明淵運三靈允協抑亦股肱翼亮之勤祈父
宣力之効故使持節侍中都督南徐兗二州揚州之晉
陵京口諸軍事太傅南徐兗二州刺史長沙景王故侍
中大司馬臨川烈武王故司徒南康文宣公穆之侍中
衛將軍開府儀同三司錄尚書事揚州刺史華容縣開
國公宏使持節散騎常侍都督江州豫州西陽新蔡晉

熙四郡軍事征南大將軍開府儀同三司江州刺史永
脩縣開國公道濟故將軍青州刺史龍陽縣開國侯鎮
惡或履道廣流秉德冲邈或雅量高劭風鑒明遠或識
唯知正才略開邁或文德以熙帝載武功以隆景業固
以侔蹤姬旦方軌伊召者矣朕以寡德繼戎鴻緒每惟
道勲思遵令典而太常未銘從祀尚闕鑒寐欽屬永言
深懷便宜敬是前式憲茲嘉禮勒功天府配祭廟庭俾
示徽章垂美長世茂績遠猷永傳不朽

長沙景王等配享廟庭詔

元嘉九年二月南史

故太傅長沙景王故大司馬臨川烈武王故司徒南康
文宣公穆之衛將軍華容公宏征南大將軍永脩公道
濟故左將軍龍陽侯鎮惡或履道廣深執德冲邈或雅
量高劭風鑒明遠或識準弘正才略開邁咸文德以弘
帝載武功以隆景業而太常未銘從祀闕享寤寐屬慮
永言興懷便宜配祭廟庭勒功天府

追崇臨川王道規詔

道規高祖少弟征荆廣
有功太祖下詔追崇

褒崇道勲經國之盛典尊親追遠因心之所隆故侍中
大司馬臨川烈武王體道欽明至德淵邈睿哲自天孝
友光備爰始協規則翼贊景業陵威致討則克剪梟鯨
逮妖逆交侵方難孔棘勢踰累綦人無固志王神謨獨
運靈武宏發輯寧內外誅覆羣凶固已化被江漢勲高
微管遠猷侔于二南英雄邁于兩獻者矣朕幼蒙殊愛
德廕特隆豐恩慈訓義深情戚永惟仁範感慕纏懷今
當擁移寢祐初祀西夏思崇嘉禮式備徽章庶以昭宣

風度允副幽顯其追崇丞相加殊禮鸞輅九旒籌屋左
纛給節鉞前後部羽葆鼓吹虎賁班紉百人侍中如故

追復廬陵王義真封詔

元嘉元年

前廬陵王靈樞在遠國封墮替感惟拱慟情若貫割王
體自至極地戚屬尊豈可令情禮永淪終始無寄可追
復先封特遣奉迎并孫脩華謝妃一時俱還言增摧哽

追崇廬陵王義真詔

元嘉三年誅徐羨之等下詔

故廬陵王含章履正英哲自然道心內昭徽風遐被遭

時多難志匡權逼天未悰禍運鍾屯險羣凶肆醜專竊
國柄禍心潛構釁生不圖朕每永念讎恥含痛內結尊
養姦慝情理未申今王道既亨政刑始判宣昭國體於
是乎在可追崇侍中大將軍王如故為慰冤魂少申悲
憤

追贈張約之詔

初以疏諫廢廬
陵王見誅詳後

乃者權臣陵縱兆亂基禍故吉陽令張約之抗疏矢言
至誠慷慨遂事屈羣醜殞命遐疆志節不申感焉兼至

昔關老奏書見紀漢策閭纂獻規荷榮晉代考其忠槩
參迹前蹤宜加旌顯式揚義烈可贈以一郡賜錢十萬

布百匹

與彭城王義康書

義康小字車子武帝子領司徒

謝述字景先陳郡陽夏人為義康驃騎長史領南郡太守先是述從兄曜為義康長史喪官述代之太祖與義康書義康入相述又為司徒左長史

今以謝述代曜其才應詳練著于歷職故以佐汝汝始
親庶務而任重事殷宜寄懷羣賢以盡弼諧之美想自

得之不俟吾言也

詔錄尚書彭城王義康

沈邵字道輝林子之子襲駙馬
都尉會彊弩將軍欽上詔義康

沈邵人身不惡吾與林子周旋異常可以補選

文帝
中詔

與義康詔

顏延之轉太子中庶子領步兵校尉辭意激
揚每犯權要出為永嘉太守甚怨憤乃作五
君詠以述竹林七賢山濤王戎以貴顯被黜
詠嵇康云鸞駟有時鍛龍性誰能馴詠阮籍
云物故不可論遊窮能無慟詠阮咸云屢薦
不入官一麾乃出守詠劉伶云韜精日沈飲

誰知非荒宴蓋自序也劉湛及義康以其辭
旨不遜大怒欲黜為遠郡文帝與義康詔乃
以光祿勳車仲遠代之於是
延之屏居不豫人間者七載

降延之為小邦不政有謂其在都邑宜動物情罪過彰

著亦士庶共悉直欲選代令思愆里閭猶復不悛當驅

往東土乃志難恕自可隨事錄治殷劉意咸無異也

景殷

仁劉湛

令一作今南史作宜
令乃志史作乃至錄治作錄之

賜義康書

義康既專摠朝權事決自已太祖疾嘗危殆
使義康具顧命以告劉湛及殷景仁湛曰天

下艱難詎是幼主所御義康景仁並不答而主簿孔胤秀等輒就尚書議曹索晉咸康末立康帝舊事義康不知也及疾豫微聞之收劉湛等義康上表遜位會稽長公主就宴集載拜稽首請其生命因慟哭上亦流涕即封所飲酒賜義康并賜書後坐范曄謀立賜死

會稽姊飲宴憶弟所餘酒今封送

並宋書所餘酒南史作所飲餘

與江夏王義恭書

義恭見後

義恭涉獵文義驕奢不節元嘉六年為荊州既出鎮太祖與書誡之

汝以弱冠便親方任天下艱難家國事重雖曰守成實亦未易隆替安危在吾曹耳豈可不感尋王業大懼負

荷今既分張言集未日無由復得動相規誨宜深自砥礪思而後行開布誠心厝懷平當親禮國士友接佳流識別賢愚鑒察邪正然後能盡君子之心收小人之力汝神意爽悟有日新之美而進德脩業未有可稱吾所以恨之而不能已已者也汝性褊急袁太妃亦說如此性之所滯其欲必行意所不在從物回改此最弊事宜應慨然立志念自裁抑何至丈夫方欲贊世成名而無斷者哉今粗疏十數事汝別時可省也遠大者豈可具

言細碎復非筆可盡禮賢下士聖人垂訓驕侈矜尚先
哲所去豁達大度漢祖之德猜忌褊急魏武之累漢書
稱衛青云大將軍遇士大夫以禮與小人有恩西門安
于矯性同美關羽張飛任偏同弊行已舉事深宜鑒此
若事異今日嗣子幼蒙司徒便當周公之事汝不可不
盡祇順之理苟有所懷密自書陳若形迹之間深宜慎
護至于爾時安危天下決汝二人耳勿忘吾言今既進
表太妃供給計足充諸用此外一不須復有求取近亦

具白此意惟脫應大餉致而當時遇有所乏汝自可少
多供奉耳汝一月日自用不可過三十萬若能省此益
美西楚殷曠常宜早起接對賓侶勿使留滯判急務訖
然後可入問訊既睹顏色審起居便應即出不須久停
以廢庶事也下日及夜自有餘閒府舍佳止園池堂觀
略所諳究計當無須改作司徒亦云爾若脫於左右之
宜須小小回易當以始至一治為限不煩紛紜日求新
異凡訊獄多決當時難可逆慮此實為難汝復不習殊

當未有次第訊前一二日取訊簿密與劉湛輩共詳大
不同也至訊日虛懷博盡慎無以喜怒加人能擇善者
而從之美自歸已不可專意自決以矜獨斷之明也萬
一如此必有大吝非唯訊獄君子用心自不應爾刑獄
不可擁滯一月可再訊凡事皆應慎密亦宜豫敕左右
人有至誠所陳不可漏泄以負忠信之款也古人言君
不密則失臣臣不密則失身或相讒構勿輕信受每有
此事當善察之名器深宜慎惜不可妄以假人昵近爵

金史卷一百一十五
卷二
賜尤應裁量吾於左右雖為少恩如聞外論不以為非
也以貴陵物物不服以威加人人不厭此易達事耳聲
樂嬉游不宜令過擣菰漁獵一切勿為供用奉身皆有
節度奇服異器不宜興長汝嬪侍左右已有數人既始
至西未可忽忽復有所納

又誠
南史共
前一篇

宜數引見佐史非唯臣主自應相見相見不數則彼我
不親不親則無因得盡人人不盡復何由知其衆事廣

引視聽既益開博於言事者又差有地也

又答

義恭鎮江陵以劉湛為南蠻校尉領府軍長史行府州事湛次子琰於江陵病卒湛求自送喪還都義恭亦為之陳請太祖答之湛字宏仁柳子歷丹陽尹以黨彭城王義康賜死

吾亦得湛啓事為之酸懷乃不欲苟違所請但汝弱年新涉庶務八州殷曠專斷事重疇諮委杖不可不得其人量算二三未獲便相順許今答湛啓權停彼葬頃朝

臣零落相係寄懷轉寡湛實國器吾乃欲引其令還直
以西夏任重要且停此事耳汝慶賞黜罰豫闕失得者
必宜悉相委寄

又

義恭性甚狷隘年又漸長欲專政事每為湛
所裁主佐之間嫌隙遂構太祖密遣使詰讓
并使深加諧緝義恭具陳湛無居下之禮雖
奉詔旨頗有怨言上友于素篤欲加柔順乃
詔之

事至於此甚為可歎當今乏才委授已爾宜盡相彌縫

取其可取棄其可棄汝疏云泯然無際如此甚佳彼多猜不可令萬一覺也汝年已長漸更事物且羣情矚望不以幼昧相期何由故如十歲時動止諮問但當今所專必是小事耳亦恐量此輕重未必盡得彼之疑怨兼或由此耶

又書

敵南渡河滑臺虎牢諸城並為所沒司州刺史尹冲戍虎牢及滎陽太守崔模抗節不降投塹死太祖與義恭書冲字子順天水冀人先為姚興吏部郎南歸

尹冲誠節志緊繼蹤古烈以為傷惋不能已

又詔

何尚之歷尚書令太子詹事致仕於方山著
退居賦以明所守詔書敦勸太祖又與義恭
詔義恭具答
尚之復攝職

今朝賢無多且羊孟尚不得告謝尚之任遇有殊便未

宜申許耶

羊孟謂羊元
元保孟顛

義恭答奏

尚之清忠貞固歷事惟允雖年在縣車而體獨克壯未

相申許下情所同

賜南郡王義宣中詔

義宣武帝子自江陵舉兵敗誅

初武帝以荊州上流形勝遺詔諸子次第居之及文帝時次當義宣以其人才素短用衡陽王義季而以義宣為南徐州會稽公主為言乃移荊州先賜中詔勤自課厲政事修理

師護以在西久比表求還出內左右自是經國常理亦何必其應於一往今欲聽許以汝代之護雖無殊績潔已節用通懷期物不恣羣下此信未易非唯聲著西土朝野以為美談在彼已有次第為士庶所安論者乃謂

未議遷之今之回換更在欲為汝耳汝與護年時一輩各有其美物議亦互有少劣若今向事脫一減之者既於西夏交有巨礙遷代之譏非歸責於吾矣復當為護怨非但一誚而已也如此則公私俱損為不可不先共善詳此事亦易勉耳無為使人動生乖論

師護義季小字互一作

各乖一作評

又

義宣鎮荊州魏南侵義宣慮寇至欲奔上明及虜退太祖詔之

善修民務不須營潛逃計也

詔報衡陽王義季

義季見後

義季素嗜酒自彭城王義康廢後遂為長夜之飲略少醒曰太祖累加詰責義季引愆陳

謝上詔報之

誰能無過改之為貴耳此非唯傷事業亦自損性命世
中比比皆汝所諳近長沙兄弟皆緣此致故將軍蘇徽
耽酒成疾旦夕待盡吾試禁斷并給藥膳至今能立此
自是可節之物但嗜者不能立志裁割耳晉元帝人主

尚能感王導之諫終身不復飲酒汝既有美尚加以吾
意殷勤何至不能慨然深自勉厲乃復須嚴相割裁坐
諸紆紆然後少止者幸可不至此一門無此酣酒汝於
何得之臨書歎塞徽南史作徽

又詔

義季雖奉此旨酣縱如初遂以成疾上又詔之

汝飲積食少而素羸多風常慮至此今果委頓縱不能
以家國為懷近不復顧性命之重可歎可恨豈復一條

本望能以理自厲未欲相苦耳今遣孫道胤就楊佛等
令晨夕視汝并進止湯食可開懷虛受慎勿隱避吾飽
嘗見人斷酒無他慊歎蓋是當時甘嗜罔已之意耳今
者憂怛政在性命未暇及美業復何為吾煎毒至此耶

又詔

義季遷徐州刺史魏人侵逼北境擾動義季
懲義康禍難不欲以功勤自業無他經畧惟
飲酒而已太祖又
詔之後二年病薨

杜驥申恬倉卒之際尚以弱甲瑣卒徼寇作援彼為元

統士馬桓桓既不懷奮發連被意旨猶復逡巡豈惟大乖應赴之宜實孤百姓之望且匈奴輕漢將自此而始賊初起逸未知指趨故且裝束兼存觀察耳少日勢漸可見便應大有經略何合安然遂不敢動遣軍政欲乘際會拯危急以申威援本無驅馳平原方幅爭鋒理又山路易馮何以畏首尾迴弱若謂事理政應如此者進大鎮聚甲兵徒為煩耳

又書

殷景仁陳郡長平人初為太尉行叅軍事累遷僕射及病卒義季時為荊州刺史上與書殷僕射疾患少日奄忽不救其識具經遠奉國竭誠周游繾綣情兼常痛民望國器遇之為難惋歎之深不能已已汝亦同不往矣如何

並宋書

答衡陽王義季

沈邵為義季右軍中兵叅軍始興王濬初開後軍府以邵為中兵義季在江陵安西府中兵久闕啓太祖求人上答之其事不果

稱意才難得沈邵雖未經軍事既是腹心作鍾離郡及

在後軍府房中甚修理或欲遣之

文帝中詔

與都督長沙王義欣手書

義欣道憐長子

蕭承之字嗣伯蘭陵人齊高帝父也元嘉初為濟南太守魏人破青部諸郡國到濟南引去文帝以承之有全城之功手書與義欣承之與擅道濟無素故事遂寢

承之理民直亦不在武幹後今擬為兗州刺史擅征南

詳之

南齊書

詔譬臨川王義慶

義慶本長沙王道憐子襲道規後歷南兗州刺史

義慶為丹陽尹加尚書左僕射元嘉八年太白星犯右執法義慶懼有災禍乞求外鎮太

祖詔譬之義慶固
求解僕射乃許

玄象茫昧既難可了且史家諸占各有異同兵星王時
有所干犯乃主當誅以此言之益無懼也鄭僕射亡後
左執法嘗有變王光祿至今平安日蝕三朝天下之至
忌晉孝武初有此異彼庸主耳猶竟無他天道輔仁福
善謂不足橫生憂懼兄與後軍各受內外之任彼以維
城表裏經之盛衰此懷實有由來之事設若天必降災
寧可千里逃避耶既非遠者之事又不知吉凶定所若

在都則有不測去此必保利貞者宜敢苟違天耶

宋書

與始興王濬詔

濬見後

沈璞除秣陵令以疾去職濬出為南徐州太祖謂璞曰濬既出蕃卿故當卧而護之與濬

詔乃為正佐

沈璞累年主簿又經國卿雖未嘗為行佐今故當正叅軍耶若爾正當署餘曹兼房任不爾便宜行佐正署中兵恐于選體如不多耳

文帝中詔

追崇外祖母蘇夫人詔

太祖所生章太后早亡奉太后所生母蘇氏甚

謹元嘉六年蘇氏卒駕往
臨哭下詔殷景仁議從之

朕夙罹偏罰情事兼常每思有以光隆懿戚少伸罔極
之懷而禮文遺逸取正所無監之前代用否又殊故惟
疑累年在心未遂蘇夫人奄至傾殂情禮莫寄追思遠
恨與事而深日月有期將卜窆窆便欲粗依春秋以貴
之義式遵二漢推恩之典但動藉史筆傳之後昆稱心
而行或容未允可時共詳論以求其中執筆永懷益增
感塞

中領軍殷景仁議

至德之感靈啓厥祥文母俁天實熙皇祚主上聿遵先
典號極徽崇以貴之義禮盡于此蘇夫人階緣戚屬情
以事深寒泉之思實感聖懷明詔爰發詢求厥中謹尋
漢氏推恩加爵于時承秦之弊儒術蔑如自君作故罔
或前典懼非盛明所宜軌蹈晉監二代朝政之所因君
舉必書哲王之所慎體至公者懸爵賞於無私奉天統
者每屈情以申制所以作孚萬國貽則後昆臣豫蒙博

逮謹露庸短

祭劉穆之墓詔

元嘉二十五年行幸江寧經穆之墓下詔

故侍中司徒南康文宣公穆之秉德佐命翼亮景業謀猷經遠元勲克茂功銘鼎彝義章典策故已嗣徽前哲宣風後代者矣近因遊踐瞻其塋域九原之想情深悼歎可致祭墓所以申永懷

誅徐羨之傅亮謝晦詔

羨之等初謀廢立先廢廬陵王義真為庶人因

廢少帝為營陽王遷吳門尋遣使弑帝殺義真於新安而立羨之亮輔政晦出為荊州刺史

史元嘉三年
正月下詔

民生於三事之如一愛敬同極豈惟名教況乃施侔造
物義在加隆者乎徐羨之傅亮謝晦皆因緣之才荷恩
在昔擢自無聞超居要重卵翼而長未足以譬永初之
季天禍橫流大明傾曜四海過密實受顧託任同負圖
而不能竭其股肱盡其心力送往無復言之節事居闕
忠貞之効將順靡記匡救蔑聞懷寵取容順成失德誰
未因懼禍以建大策而逞其悖心不畏不義播遷之始

謀肆醢毒至止未幾顯行怨殺窮凶極虐荼酷備加顛
沛皂隸之手告盡逆旅之館都鄙哀愕行路飲涕故廬
陵王英秀明遠徽風夙播魯衛之寄朝野屬情羨之等
暴蔑求專忌賢畏逼造構貝錦成此無端罔主蒙上橫
加流屏矯誣朝旨致茲禍害寄以國命而剪為仇讎旬
月之間再肆醢毒痛感三靈怨結人鬼自書契以來棄
常安忍反易天明未有如斯之甚者也昔子家從弑鄭
人致討宋肥無辜蕩澤為戮況逆亂倍於往釁情痛深

於國家此而可容孰不可忍即宜誅殛告謝存亡而于
時大事甫爾異同紛結匡國之勲實著莫大之罪未彰
是以遠酌民心近聽輿誦雖欲討亂慮或難圖故忍戚
含哀懷恥累載每念人生實難情事未展何嘗不顧影
慟心伏枕泣血今逆臣之釁彰暴遐邇君子悲情義徒
思奮家讎國恥可得而雪使命司寇肅明典刑晦據有
上流或不即罪朕當親率六師為其遏防可遣中領軍
到彥之即日電發征北將軍檀道濟絡驛繼路符衛軍

府州以時收剪已命征虜將軍劉粹斷其走伏罪止元
凶餘無所問感惟永往心情崩絕氛霧既祛庶幾治道

爾

誅檀道濟詔

道濟為南兗州刺史與徐羨之等共謀廢立且建功前朝威名甚重

諸子又有才氣朝廷疑畏之太祖屢年寢疾元嘉十三年春道濟以江州刺史入朝收付

廷尉并其八子伏誅

檀道濟階緣時幸荷恩在昔寵靈優渥莫與為比曾不
感佩殊遇思答萬分乃空懷疑貳履霜日久元嘉以來

猜阻滋結不義不昵之心附下罔上之事固已暴之民
聽彰于遐邇謝靈運志凶辭醜不臣顯著納受邪說每
相容隱又潛散金貨招誘剽猾逋逃必至實繁彌廣日
夜伺隙希冀非望鎮軍將軍仲德往年入朝屢陳此迹
朕以其位居台鉉豫班河岳彌縫容養庶或能革而長
惡不悛凶慝遂邁因朕寢疾規肆禍心前南蠻行叅軍
龐延祖具悉奸狀密以啓聞夫君親無將刑茲罔赦况
罪釁深重若斯之甚便可收付廷尉肅正刑書事止元

惡餘無所問

贈楊萬壽等詔

往年氏豎楊難當造為叛亂俛首者衆其長史楊萬壽
建節將軍姚憲情不違順屢進矢言及凶醜宵遁闔境
崩擾建忠將軍呂訓衛倉儲以候王師寧朔將軍姜檀
果烈懇到志在宣力濁水之捷厥庸顯然近者協贊義
奮乃心無替洛陽符昭誠係本朝亦同斯舉俘擒偽將
獨克武興推鋒致効隕命寇手並事著屯險感于予懷

宜蒙旌叙榮慰存亡可贈萬壽龍驤將軍昭武都太守
憲補員外散騎侍郎訓駙馬都尉奉朝請擅征西大將
軍司馬仇池太守宜並內徙可符雍梁二州厚加贍卹

贈姜道盛詔

故晉壽太守姜道盛前討仇池志輸誠力即戎著効臨
財能清近先登濁水殞身鋒鏑誠節俱亮矜悼于懷可
贈給事中賜錢千萬

贈劉康祖詔

元嘉二十七年太祖將北伐康祖
以左軍將軍率豫州軍出許洛及

于尉武與敵遇中
流矢卒明年詔贈

康祖班師尉武戎律靡忒對衆以寡殲殄大半猛氣雲
騰志申力屈沒世徇節良可嘉悼宜加甄寵以旌忠烈
可贈益州刺史諡曰壯

沈演之范曄拜官詔

摠司戎政翼贊東朝惟允之舉匪賢莫授侍中領右衛
將軍演之清業貞審器思沈濟右衛將軍曄才應通敏
理懷清要並美彰出內誠亮在公能克懋厥猷樹績所

莅演之可中領軍曄可太子詹事

劉道錫申坦進官詔

道錫為巴西梓潼二郡元嘉十八年為氐羌所攻保

城退敵太祖

嘉之下詔

前者兵寇攻逼邊情波駭廣威將軍巴西梓潼二郡太守劉道錫將率文武盡心固守保全之績厥效可書可冠軍諮議參軍前建威將軍晉壽太守申坦孤城弱衆厲志致果死傷參半壯氣不衰雖力屈陷沒在誠宜甄可建威將軍巴西梓潼二郡太守

徙謝靈運廣州詔

靈運為臨川內史在郡放縱為有司所糾司徒遣收遂興

兵叛逸禽送廷尉奏正斬刑上終愛其才詔徙廣州詳靈運下

靈運罪釁累仍誠合盡法但謝元勲參微管宜宥及後

嗣可降死一等徙付廣州

誅丹陽尹劉湛詔

元嘉中彭城王義康專秉朝權湛為丹陽尹互相黨援以

致主相乖疑釁難將作十七年冬下詔收湛於獄賜死義康亦廢湛為晉左光祿大夫

柳之子

劉湛階藉門蔭少叨榮位往佐歷陽奸諛夙著謝晦之

難潛使密告求心即事久宜誅屏朕所以棄罪略瑕庶收後効寵秩優忝踰越倫匹而凶忍忌克剛愎靡厭無君之心觸遇斯發遂乃合黨連羣構扇同異附下蔽上專弄威權薦子樹親互為表裏邪附者榮曜九族秉理者推陷必至旋觀奸慝為日已久猶欲弘納遵養異或悛革自邇以來凌縱滋甚悖言懟容罔所顧忌陰謀潛計瞬睨兩宮豈唯彰暴國都固亦達於四海比年七曜違度震蝕表災侵陽之徵事符幽顯搢紳含憤義夫興

歎昔齊魯不綱禍傾邦國昭宣電斷漢祚方延便收付
廷尉肅明刑典

答糾令僕詔

徐湛之轉尚書僕射時尚書令何尚之以湛之國戚任隆欲以朝政

推之湛之亦以今無不揔又以事歸尚之御史中丞並奏免官詔與尚之並受辭譟

令僕治務所寄不共求體當而互相推委糾之是也然
故事殘舛所以致茲疑執特無所問時詳正之

賜始興太守徐豁詔

始興太守豁潔已退食怡居在官政事修理惠澤沾被

近嶺南荒弊郡境尤甚拯卹有方濟厥饑饉雖古之良
守茂以尚焉宜蒙褒賞以旌清績可賜絹二百匹穀千
斛

賜徐豁營葬詔

豁廉清勤恪著稱所司故擢授南服申其才志不幸喪
殞朕甚悼之可賜錢十萬布百匹以營葬事

贈廣州刺史陸徽詔

徽厲志廉潔歷任恪勤奉公盡誠克已無倦褒榮未申

不幸夙殞言念在懷以為傷恨可贈輔國將軍本官如故賜錢十萬米二百斛

賜晉壽太守郭啓元家穀詔

故綏遠將軍晉壽太守郭啓元往銜命北庭秉意不屈受任白水盡勤靡懈公奉私餼纖毫弗納布衣蔬食飭躬惟儉故超授顯邦以甄廉績而介誠苦節終始匪貳身死之日妻子凍餒志操殊俗良可哀悼可賜其家穀五百斛

徵戴顥宗炳詔

並不就

新除通直散騎侍郎戴顥太子舍人宗炳並志託丘園
自求衡華恬靜之操久而不渝顥可國子博士炳可通
直散騎侍郎

擢陳憲詔

南平王鐸鎮壽陽以憲行郡事固
守懸瓠魏主攻城四十二日不拔

右軍行參軍行汝南新蔡二郡軍事陳憲盡力捍禦全
城摧寇忠敢之効宜加顯擢可龍驤將軍汝南新蔡二
郡太守

賜蕭思話手敕

思話見後

思話善彈琴能騎射為臨川王義慶平西長史南蠻校尉太祖賜以弓琴手敕

丈人頃何所作事務之暇故以琴書為娛耳所得不曰義邪眷想常不忘情想亦同之前得此琴云是舊物亦有名京邑今以相借因是戴顓意於彈撫響韻殊勝直爾嘉也并往桑弓一張材理乃快先所常用既久廢射又多病略不能制之便成老公令人歎息良材美器宜在盡用之地丈人真無所與讓也

詔蕭思話

張永為義恭太尉中兵叅軍越騎校尉振武將軍太祖謂堪為將督王元謨申坦等經畧河南攻礪礪城累旬不能拔為敵所乘殺傷甚衆撫軍將軍蕭思話收永等繫厯城獄太祖以屢征無功諸將不可任責永等與思話詔又與義恭書

敵既乘利方向盛冬若脫敢送死兄弟父子自共當之耳言及增憤可以示張永申坦

又與江夏王義恭書

早知諸將輩如此恨不以白刃驅之今者悔何所及

又詔蕭思話

沈演之歷轉吏部尚書領太子右衛率卒時思話為雍州刺史徵為吏部尚書文帝詔之

沈尚書暴病不救其體業貞審立朝盡公年時尚可方相委任奄忽不永痛惋特深銓管要機通塞所寄丈人才用體國二三惟允

沈亮授職詔

亮由南陽太守遷南譙王司空中兵叅軍詔曰

陝西心膂須才故授卿此職

別詔沈璞

璞字道貞林子少子歷淮南太守太宗初被害

璞為盱眙太守時王師北伐璞與臧質計拒
魏主燾遁走太祖遣中使深相褒美別詔

近者險急老弱殊當憂迫耶念卿爾時難為心想百姓
流轉已還此遣部運尋至委卿量所贍濟也

答何承天

承天
見後

承天素好奕棊頗用廢事太
祖賜以局子承天表謝上答

局子之賜何必非張武之金耶

詔戒劉道濟

道濟沛
郡蕭人

道濟為益州刺史費謙等並聚斂
興利而道濟任之太祖與道濟詔

聞卿在任未盡清省又頗為殖貨若萬一有此必宜改
之比傳人情不政緝諧當以法御下深思自警以副本
望

蕭承之拜龍驤將軍詔

承之元嘉中為漢中太守拒退氏帥楊難當梁

州平下詔齊
高帝父也

承之稟命先驅蒙險深入全軍屢剋奮其忠果可龍驤

將軍隨府轉寧朔司馬太守如故

南齊書

與魏世祖拓跋燾求馬書

肅遣員外散騎侍郎王老壽乘驛就太祖乞
黃甘太祖餉甘十簿甘蔗干挺并就求馬老
壽反命未出
境魏兵深入

自頃歲成民阜朝野無虞春末當東巡吳會以盡游豫
臨滄海探禹穴陟姑蘇之臺搜長洲之苑舟楫雖盛寡
于良駟想能惠以逸足令及此行

詔百濟王餘映

元嘉二年太祖詔其
後每歲貢獻不絕

皇帝問使持節督百濟諸軍事鎮東大將軍百濟王累

葉忠順越海效誠遠王纂戎聿修先業慕義既彰厥懷
亦款浮桴驪水獻琛執贄故嗣位方任以藩東服勉勗
所蒞無墜前蹤今遣兼謁者閭丘恩子兼副謁者丁敬
子等宣旨慰勞稱朕意

並宋書

吐谷渾慕瑣除授詔

少帝時瑣兄阿豺表請除命未至豺死元嘉六年瑣

復上表明
年詔授

吐谷渾慕瑣兄弟慕義至誠可嘉宜授策爵以甄忠款
可督塞表諸軍事征西將軍沙州刺史隴西公

訶羅單婆皇婆達三國除授詔

訶羅單婆皇婆達三國頻越遐海款化納貢遠誠宜甄
可並加除授

策命

惟爾慕義款化效誠遐恩之所洽殊遠必甄用敷典
章顯茲策授爾其欽奉凝命永固厥職可不慎歟

婆皇國王舍利婆羅跋摩策

惟爾仰政邊城率貢來庭皇澤凱被無幽不洽宜班典

策授茲嘉命爾其祇順禮度式保厥終可不慎歟

嬖達國王舍利不陵伽跋摩策命

惟爾仰化懷誠馳慕聲教皇風遐暨荒服來款是用加
茲顯策式甄義順爾其祇順憲典永終休福可不慎歟

勞氏帥揚文德詔

近者校尉仇池公表敵縱逸寇竊仇池將士挫傷民萌
塗炭眷言西顧矜慨在懷揚文德世篤忠順誠感家國
糾率義徒奄殄凶醜鋒旗所向殲潰無遺氛祲澄清蕃

境寧一念功惟事良有欣嘉便可遣使慰勞宣示朝旨
并敕梁州刺史申坦隨宜應援

又封武都王詔

顯錄勲效蓋惟國典施賞務速無或踰時楊文德志氣
果到文武兼全乘機潛奮殊功仍集告捷歸誠獻俘萬
里朝無斲土樹難自肅休烈昭著朕甚嘉焉楊氏世祖
西勞方忠累葉宜紹先緒膺受寵榮可使持節散騎常侍
都督北秦雍二州諸軍事征西大將軍平羌校尉北秦

州刺史封武都王

封且渠無諱河西王詔

無諱遣兵襲高昌據之奉表獻方物太祖詔

往年狡寇縱逸侵害涼土西河王茂虔遂至不守淪陷
寇逆累世著誠以為矜悼次第無諱克紹遺業保據方
隅外結鄰國內輯民庶係心闕庭踐修貢職宜加朝命
以褒篤勲可持節散騎常侍都督涼河沙三州諸軍事
征西大將軍領護匈奴中郎將西夷校尉涼州刺史河

西王

且渠安周襲封河西王詔


故征西大將軍河西王無諱弟安周才略沈到世篤忠
款統承遺業民衆歸懷雖亡士喪師孤立異所而能招
率殘寡攘寇自今宜加榮授垂軌先烈可使持節散騎
常侍都督涼河沙三州諸軍事領西域戊巳校尉涼州
刺史河西王

脩伐林邑功詔

元嘉二十三年使交州刺史檀和之伐林邑國破之其主范陽

邁父子奔逃多獲珍異
上嘉將帥之功下詔

林邑介恃遐險久稽王誅龍驤將軍交州刺史檀和之
忠果到列思略經濟稟命致討萬里推鋒法命肅齊文
武畢力潔已奉公以身率下故能立勲海外震服殊俗
宜加褒飭叅管近侍可黃門侍郎領越騎校尉行建武
將軍龍驤司馬蕭景憲協贊軍首勤捷顯著摠勒前驅
尅殄巢穴必能威振荒夷撫懷民庶可持節督交州廣
州之鬱林寧浦二郡諸軍事建威將軍交州刺史龍驤
司馬童林之九真太守傅蔚祖戰死並贈給事中



宋文紀卷二

欽定四庫全書

集部

宋文紀卷三

詳校官庶吉士臣瑚圖禮

主事銜臣徐以坤覆勘

總校官進士臣楊懋珩

校對官中書臣李斯咏

謄錄舉人臣薛炳文

欽定四庫全書

宋文紀卷三

明 梅鼎祚 編

孝武帝

名駿字休龍文帝第三子封武陵王為江州刺史起誅元凶劬自立在位十一年廟

號世祖

臨徐兗二州搜揚教

徐方地兼梁楚秀士攸出兗土樂頌所流風禮自古豈
不異人比肩鴻才世及或踈散山林不聞進達或栖息
閭閻懷寶待耀孝性義門明經善政者所在搜揚舉進

咸用名聞

在藩上白雉表

白體表素彩儀稟識自擾陶氣仁風練色淳露不斲一

飲之逸不資三異之勤

下並藝
文類聚

建平王宏冠表

宏筮辰協吉撰禮備容資比成德允被休典

廣陵王誕冠表

臣誕年禮既升擇休申冠順棄有成服美任典

慶雲贊

非煙非雲曳紫流光懸華曜藻奄爵臺堂粵予休明震
乎珍祥積慶有文靈眈無疆

洞井贊

絡紀山瑞紫志川靈金膏溢曜玉樹含英端巖毓泉挹
祥吐禎彪彬仙牒揮翕詭經

清暑殿西薨嘉禾贊

維殷粵周有穗表禎祥乎合矣超瑞高薨非原非澤乃

瑞乃靈庶藉天貺廣茲化清

梨花贊

沃瘠異壤舒慘殊時惟氣在春具物含滋嘉樹之生于
彼山基開榮布彩不離塵縑

孤桐贊

珍無隱德產必有甄資此孤幹獻枝楚山稍星雲界衍
葉炎塵名列貢寶器贊虞絃

巡幸舊宮頌

惟皇敬眷永慕徐京列裝青野動軌丹廷榮和首律景
澤開年林垌發色川郊列泉沿沂遙衍登陟廻懸踐域
負外即宮臨山思申陵寢歡結粉都眇懷沛澤勤念宛
吾納壽遺老設飲先居堂序缺朝秀廷集閭

芳春琴堂橘連理頌

列訪神秘詳觀瑞策通柯竦秀實靈所錫離條別榦淹
一榮戚道被遐夷承我正厯

故侍中司徒建平王宏墓誌銘

含榮幼耀膺和早慧徘徊天人優遊經藝鴻沚纔流皇
根中絕體孝盡性懷追孝烈反我宸居毀綱更結管機
凝務端朝贊契召輝才融士穎風折秘路長陰昭塗永
減

太室牛鼎銘

陳隨隱漫錄云紹興初有獻鼎于
行都上賜三茅觀高一尺三寸有

咫兩耳旁出三足與首皆類牛腹外周紋如
篆籀腹內篆銘乃宋孝武帝孝建元年八月

二日肇作以
享太室者

維甲午八月丙寅帝若稽古肇宋鼎審厥象作牛鼎格

于太室從用享億萬寧神休惟帝時寶萬世其永賴

田汝

成西湖志載宋高宗紹興二十年出古器賜三茅寧壽觀其一漢鼎云有漢建元三年八月作牛鼎祀太室銘曰惟甲午丙寅帝若稽古肇作宋器審厥象作牛鼎格于位室從用饗億寧神休惟帝時保萬世其永賴鼎按建元乃漢武帝三年為癸卯宋孝武帝孝建元年甲午也且中有肇宋語志當傳訛而辭小異

析晴文

幽明失序就陰則滯連雨霖霖注而不替潤既違時澤而非惠幸輟霖而吐景權停雲而歛翳照鸞輅於大郊光龍旂於田際耒耜得施黍稷獲藝增高廩於嘉年登

十千於茲歲

藝文類聚

擬漢武帝李夫人賦序

殷淑儀寵傾後宮及薨進號貴妃謚曰宣上痛愛不

已遂擬是賦又諷有司奏立新廟

朕以亡事棄日閱覽前王詞苑見李夫人賦悽其有懷亦嗟詠久之因感而會焉

大使巡省風俗詔

世祖以元嘉三十年四月自江州入討元凶至新亭即位

五月克定京邑逆黨伏誅下詔

天步艱難國道用否雖基構永固而氣數時愆朕以眇

身奄承皇業奉尋厯命寤寐震懷萬邦風政人治之本
感念陵替若疚在心可分遣大使巡省方俗

施行經給之宜詔

三十年
六月

興王立訓務弘治節輔臣佐時勤獻政要仰惟聖規每
存茲道猥以眇躬屬承景業闡揚遺澤無廢厥心夫量
入為出邦有恒典而經給之宜多違常度兵役糜耗府
藏散減外內衆供未加損約非所以聿遵先旨敬奉遺
圖自今諸可薄已厚民去煩從簡者悉宜施行以稱朕

意

舉羣善詔

三十年七月

世道未夷惟憂在國夫使羣善畢舉固非一才所議况以寡德屬衰薄之期夙宵寅想永懷待旦王公卿士凡有嘉謀善政可以維風訓俗咸達乃誠無或依隱

崇約弛禁詔

三十年七月

百姓勞弊徭賦尚繁言念未乂宜崇約損凡用非軍國宜悉停功可省細作并尚方雕文靡巧金銀塗飾事不

闕實嚴為之禁供御服膳減除遊侈水陸捕採各順時
日官私交市務令優衷其江海田池公家規固者詳所
開弛貴戚競利悉皆禁絕

勸農舉士詔

孝建元年正月

首食尚農經邦本務貢士察行寧朝當道內難甫康政
訓未洽衣食有仍耗之弊選造無觀國之美昔衛文勤
民高宗恭默卒能收賢巖穴大殷季年朕每側席疚懷
無忘鑒寐凡諸守蒞親民之官可詳申舊條勸盡地利

力田善蓄者在所具以名聞褒甄之科精為其格四方
孝秀非才勿舉獻答允值即就銓擢若止無可採猶賜
除署若有不堪酬奉虛竊榮薦遣還田里加以禁錮尚
書百官之元本庶績之樞機丞郎列曹局司有在而項
事無巨細悉歸令僕非所以衆材成構羣能濟業者也
可更明體制咸責厥成糾覈勤惰嚴施賞罰

建孔廟詔

元年
十月

仲尼體天降德維周興漢經緯三極冠冕百王爰自前

代咸加褒述典司失人用闕宗祀先朝遠存遺範有詔
繕立世故妨道事未克就國難頻深忠勇奮厲實憑聖
義大教所敦永惟兼懷無忘待旦可開建廟制同諸侯
之禮詳擇爽塏厚給祭秩

諸苑假與貧民詔

二年八月

諸苑禁制綿遠有妨肄業可詳所開弛假與貧民

惠宥羣徒詔

二年九月

國道再屯艱虞畢集朕雖寡德終膺鴻慶惟新之旨實

深百王而惠宥之令未殊常渥永言勤慮寤寐載懷在
朕受命之前凡以臯徙放悉聽還本犯釁之門尚有存
者子弟可隨才署吏

選散騎常侍詔

初晉世散騎常侍選望甚重與侍中不異其後用人漸輕孝建

三年世祖欲重其選下詔吏部尚書顏竣奏薦孔顗王或

散騎職為近侍事居規納置任之本實惟親要而頃選
常侍陵遲未允宜簡授時良永寘清轍

顏竣奏

常侍華選職任俟才新除臨海太守孔顗意業閒素司徒長史王彧懷尚清理並任為散騎常侍

聽申奏詔

大明元年十月

旒纁之道有孚于結繩日昃之勤已切于姬后況世弊教淺歲月澆季朕雖戮力寓內未明求衣而識狹前王務廣昔代永言菲德其愧良深朝咨野怨自達者寡惠民利公所昧實衆自今百辟庶尹下民賤隸有懷誠抱志擁鬱衡閭失理負謗未聞朝聽者皆聽躬自申奏小

大以聞朕因聽政之日親對覽焉

春務貸給糧種詔

二年正月

去歲東土多經水災春務已及宜加優課糧種所須以時貸給

追叙先恩詔

二年正月

先帝靈命初興龍飛西楚歲紀浸遠感往纏心奉迎文
武情深常隸思弘殊澤以申永懷吏身可賜爵一級軍
戶免為平民

牧守卹贈貧弱詔

二年
二月

政道未著俗弊尚深豪侈兼并貧弱困窘存闕衣裳沒
無歛摺朕甚傷之其明敕守宰勤加存卹賻贈之科速
為條品

寬申逋亡詔

二年
六月

往因師旅多有逋亡或連山染逆懼致軍憲或辭役憚
勞苟免刑罰雖約法從簡務思弘宥恩令驟下而逃逋
猶多宜習愚為性狃惡難反將在所長吏宣導乖方可

普加寬申咸與更始

審貢賦詔

二年十月
二月

夫山處巖居不以魚鼈為禮項歲多虞軍調繁切違方
設賦本濟一時而主者玩習遂為常典朶幹瑤琨任土
作貢積羽羣輕終致深弊永言弘革無替朕心凡寰衛
貢職山淵採捕皆當詳辨產殖考順歲時勿使牽課虛
懸睽忤氣序庶簡約之風有孚於品性惠敏之訓無漏
於幽仄

賻給北討文武詔

三年八月

近北討文武於軍亡沒或殞身矢石或癘疾死亡並盡勤王事而歛槨卑薄可普更賻給務令豐厚

原宥徒隸詔

三年八月

昔姬道方凝刑罰斯厝漢德初明犴圉用簡良由上一其道下淳其性今民澆俗薄誠淺偽深重以寡德弗能心化故知方者尠趣辟實繁向因巡覽見二尚方徒隸嬰金履校既有矜復加國慶民和獨隔凱澤益以慙焉

可詳所原宥

依舊聽訟詔

三年九月

夫五辟三刺自古所難巧法深文在季彌甚故沿情察
訟魯師致捷市獄勿擾漢使飛聲廷尉遠邇疑讞平決
攸歸而一蹈幽圜動逾時歲民嬰其困吏容其私自今
囚至辭具並即以聞朕當悉詳斷庶無留獄若繁文滯
劾證逮遐廣必須親察以盡情狀自後依舊聽訟

行親桑詔

三年十月

古者薦鞠青壇聿祈多慶分繭玄郊以供純服來歲可使六宮妃嬪修親桑之禮

皇太后觀桑禮詔

孝武王皇后傳云大明四年三月后率六宮躬桑于西郊

皇太后觀
禮上下詔

朕卜祥大昕測辰拂羽爰詔六宮親蠶川室皇太后降鑾從御佇蹕觀禮綠籊既具玄統方修庶儀發椒闈化動中縣妃主以下可量加班錫

詳減四時供限詔

四年四月

昔紂衣御寓貶甘示節土簋臨天飭儉昭度朕綈帛之
念無忘于懷雖深詔有司省遊務實而歲月兼積年量
虛廣豈以捐豐從損允稱約心四時供限可詳減太半
庶表締順典有偃民華纂組傷工無競屢市

卹贍疫癘詔

四年

都邑節氣未調疫癘猶衆言念民瘼情有矜傷可遣使
存問并給醫藥其死亡者隨宜卹贍

聞武原赦詔

五年
二月

昔人稱人道何先於兵為首雖淹紀勿用忘之必危朕
以聽覽餘閒因時講事坐作有儀進退無爽軍幢以下
普量班錫頃化弗能孚而民未知禁逋役違調起觸刑
網凡諸逃亡在今昧爽以前悉皆原赦已滯囹圄者釋
還本役其逋負在大明三年以前一賜原停自此以還
鰥貧疾老詳所申減伐蠻之家蠲租稅之半近籍改新
制在所承用殊謬實多可普更符下聽以今為始若先
已犯制亦同蕩然

南徐兗二州緩租詔

五年
二月

南徐兗二州去歲水潦傷年民多困窶逋租未入者可

申至秋登

雨水遣使巡行詔

五年
七月

雨水猥降街衢泛溢可遣使巡行窮弊之家賜以薪粟

修葺庠序詔

五年
八月

自靈命初基聖圖重遠參正樂職感神明之應崇殖禮
圉奮至德之光聲實同和文以均節化調其俗物性其

情故臨經式奠煥乎炳發道喪世屯學落年永獄訟微
哀息之術百姓忘退素之方今息警夷嶂恬波河渚棧
山航海鄉風慕義化民成俗茲時篤矣來歲可修葺庠
序旌延國胄庚寅制方鎮所假白板郡縣年限依臺除
食祿三分之一不給送

簡惠王畿詔

五年十
一月

王畿內奉京師外表衆夏民殷務廣宜思簡惠可遣尚
書就加詳檢并與守宰平治庶獄其有疑滯具以狀聞

大閱詔

七年正月

春蒐之禮著自周令講事之語書于魯史所以昭宣德
度示民軌則今歲稔氣榮中外寧晏當因農隙葺是舊
章可克日于玄武湖大閱水師并巡江右講武校獵

遣祭霍山詔

七年二月

江漢楚望咸秩周禋禮九疑於盛唐祀蓬萊於渤海皆
前載流訓列聖遺式霍山是曰南嶽實惟國鎮韞靈呈
瑞肇光宋道朕駐蹕于野有事岐陽瞻睇風雲徘徊以

想可遣使奠祭

校獵歷陽大赦詔

七年二月車駕校獵于歷陽之烏江

朕受天慶命十一年於茲矣憑七廟之靈獲上帝之力
禮橫四海威震八荒方巡三湘而奠衡嶽次九河而檢
云岱今恢覽功成省風畿表觀民六合蒐校長洲騰沙
飛礫平嶽蕩海鼓晉合序銑鉦協節獻鬯如禮饁獸傾
郊敬舉王公之觴廣納士民之壽八風循通卿雲叢聚
盡天罄瑞率宇竭歡思散太極之泉以福無方之外可

大赦天下行幸所無出今歲租布其逋租餘債勿復收
賜民爵一級女子百戶牛酒刺守邑宰及民夫從蒐者
普加洽賚

又詔

朕弱年操製出牧阿維承政宣風薦歷年紀國步中阻
治戎江甸難夷情義實繫于懷今或練蒐訓旅涉茲境
問故邑耆舊在目罕存年世未遠殲亡大半撫迹惟事
傾慨兼著太宗燕故晉陽洽恩世祖流仁濟畿暢澤永

言往猷思廣前賚可蠲歷陽郡租輸三年遣使巡慰問
民疾苦鰥寡孤老六疾不能自存者厚賜粟帛高年加
以羊酒凡一介之善隨才銓貫前國名臣及府州佐吏
量所沾錫人身已往施及子孫

禁專殺詔

七年四月

自非臨軍戰陳一不得專殺其罪甚重辟者皆如舊先
上須報有司嚴加聽察犯者以殺人罪論

敕刺史守令奉手詔詔

七年五月

自今刺史守宰動民興軍皆須手詔施行唯邊隅外警
及姦黷內發變起倉卒者不從此例

檢糾占固山澤詔

七年七月

前詔江海田池與民共利歷歲未久浸以弛替名山大
川往往占固有司嚴加檢糾申明舊制

秋旱賑給詔

七年八月

昔匹婦含怨山樵北鄙孀妻哀慟臺傾東國良以誠之
所動在微必著感之所震雖厚必崩朕臨察九野志深

待旦弗能使爛然成章各如其節遂令災精損和陽偏
不施歲云不稔咎實朕由大官供膳宜從貶撤近道刑
獄當親料省其王畿內及神州所統可遣尚書與所在
共訊畿外諸州委之刺史并訊省律令思存利民其考
謫貿襲在大明七年以前一切勿治尤弊之家開倉賑
給

貸麥種詔

七年
九月

近災精亢序苗稼多傷今二麥未晚甘澤頻降可下東

郡境勤課墾殖尤獎之家量貸麥種

省方詔

七年九月

昔周王驥迹實窮四溟漢帝鑾軫夙徧五嶽是皆所以
上對幽靈下理民土自天昌替馭臨宮創圖禮代天鬱
世貿興毀皇家造宋日月重光璇璣得序五星順命而
戎車歲動陳詩義闕朕聿含五光奄一天下思盡寶戒
之規以塞謀危之路當沿時省方觀察風俗外詳考舊
典以副側席之懷

車駕巡南豫州詔

七年十月

朕巡幸所經先見百年者及孤寡老疾並賜粟帛獄繫
刑罪並親聽訟其士庶或怨鬱危滯受抑吏司或隱約
潔立負擯州里皆聽進朕前面自陳訴若忠信孝義力
田殖穀一介之能一藝之美悉加旌賞雖秋澤頻降而
夏旱嬰弊可即開行倉並加賑賜

行幸考績詔

七年十月

賞慶刑威奄國彛軌黜幽升明闢寓恒憲故採言聆風

式觀侈質賤爵加地于是乎在今類帝宜社親巡江甸
因覲嶽守躬求民瘼思弘明試之典以申考績之義行
幸所經益民之職功宣于聽即加甄賞若廢務亂民隨
詭議罰主者詳察以聞

停東境雜稅詔

八年正月

東境去歲不稔宜廣商貨遠近販鬻米者可停道中雜
稅其以仗自防悉勿禁

收拯東境詔

八年二月

去歲東境偏旱田畝失收使命來者多至乏絕或下窮
流穴頓伏街巷朕甚憫之可出倉米付建康秣陵二縣
隨宜贍卹若溫拯不時以至捐棄者嚴加糾劾

巡幸賑卹詔

初學記

夫足踐目見實遵天命尚怨踰深眊俗未同其化自遠
幽隱不得其所故降省風俗躬撫黎元

巡狩省風俗詔

初學記

朕聿合五色奄一天下當沿時省方觀察風俗外詳考

舊典以副側席之懷也

建明堂詔

大明五年詔有司奏依晉裴頠議但作大殿屋雕畫而已

昔文德在周明堂崇祀高烈惟漢汶邑斯尊所以職祭
罔讐氣令斯正鴻名稱首濟世飛聲朕皇考太祖文皇
帝功曜洞元聖靈昭俗內穆四門仁濟羣品外薄八荒
威憺殊俗南腦勁越西髓剛戎裁禮興稼穡之根張樂
協四氣之紀匡飾墳序引無題之外旌延寶臣盡盛德
之範訓深劭農政高刑厝萬物逮通百神薦祉動協天

度下沿地德故精緯上靈動殖下瑞諸侯軌道河濶海
夷朕仰憑洪烈入子萬姓皇考降祐迄將一紀思奉揚
休德永播無窮便可詳考姬典經始明堂宗祀先靈式
配上帝誠敬克展幽顯咸秩惟懷永遠感慕崩心

有司議奏

伏尋明堂辟雍制無定文經記參差傳說乖舛名儒通
哲各事所見或以為名異實同或以為名實皆異自漢
暨晉莫之能辨周書云清廟明堂路寢同制鄭元注禮

義生於斯諸儒又云明堂在國之陽丙巳之地三里之內至於室宇堂个戶牖達向世代湮緬難得該詳晉侍中裴頠西都碩學考詳前載未能制定以為尊祖配天其義明著廟宇之制理據未分直可為殿以崇嚴祀其餘雜碎一皆除之參詳鄭元之注差可準據裴頠之奏竊謂可安國學之南地實丙巳夾塏平暢足以營建其墻宇規範宜擬則太廟唯十有二間以應晷數依漢汶上圖儀設五帝位太祖文皇帝對饗祭皇天上帝雖為

差降至於三載恭祀理不容異自郊俎宮亦宜共日禮
記郊以特牲詩稱明堂羊牛吉蠲雖同質文殊典且郊
有燔柴堂無禋燎則鼎俎彝簋一依廟禮班行百司搜
材簡工權置起部尚書將作大匠量物商程尅今秋繕
立

置古帝王冢戶詔

太平御覽

先代帝王因時創業君人建國禮尊南面而厯運推移
年代久遠丘壠殘毀樵牧相趨塋兆湮蕪封樹莫辨自

古以來帝王陵墓可隨近十戶蠲其役以供守視

立闕詔

輿地志云博望梁山東西隔江相對如門相去數里謂之天門宋孝武詔仍以

二山

立闕

梁山天表象魏以施國形

分置吏部尚書詔

上常慮權移臣下以吏部尚書選舉所由欲輕其勢力大

明二年下詔分置又別詔太宰江夏王義恭於是吏部置尚書二人省五兵尚書謝莊及

度支尚書顧顗

之並補選職

八柄馭下以爵為先九德咸事政典居首銓衡治樞興

替攸寄頃世以來轉失厥序徒秉國鈞終貽權謗今南北多士勲勤彌積物情善否實繁斯任官人之詠維聖克允則哲之美粵帝所難加澆季在俗讓讓成風以一人之識當羣品之誚望沈浮自得庸可致乎吏部尚書可依郎分置并詳省閒曹

別詔太宰江夏王義恭

分選詔旦出在朝論者亦有同異誠知循常甚易改舊生疑但吏部尚書由來與錄共選良以一人之識不辨

洽通兼予奪威權不宜專一故也前述宣先旨敬從來
奏省錄作則永貽後昆自此選舉之要唯由元凱一人
若通塞乖衷而訴達者尠且違令與物理至隔闕前王
盛主猶或難之況在寡闇尤見其短又選官裁病即嗟
誚滿道人之四體會盈有虛旬日之間便至怨詈況實
有假託不由寢頓者耶一詣不前貧苦交困則兩邊致
患互不相體校之以實並有可哀若職置二人則無此
弊兼選曹樞要歷代斯重人經此職便成貴塗已心外

議咸不自限故范曄魯爽舉兵滅門以此言之實由榮
厚勢驅殷繁所致設可擬議此授唯有數人本積歲月
稍加引進而理無前期多生慮表或嬰艱抱疾事至回
移官人之任決不可闕一來一去向人已周非有點責
已貴難賤既成妨長寘之無所盛衰遽襲便是一段世
臣相處之方臣主生疑所以彌覺此職宜在降階監令
端右足處時望無人則闕異于九流今但直銓選部有
減前資物情好猜橫立別解本旨向意終不外宣唯有

從郎分置視聽自改選既輕先民情已變有堪其任大
展遷回兼常之宜以時稍進本職非復重官可不須
帶帖數過居之盡無詒怪自中分荆揚子時便有意於
此正訝改過不少容生駭惑爾來多年欲至歲下處分
會何偃致故應有親人故近因此施行本意詔文不得
委悉故復紙墨具陳

臺省相臨詔

長沙王義欣次子祇大明中為中書郎太宰江夏王義恭領中書監

服親不得相臨
表求解職下詔

昔二王兩謝俱至宗禮自今三臺五省悉同此例

行幹杖詔

初五省官所給幹僮不得雜役沈統為著作佐郎生輕役過差奏免世祖

下詔

自頃幹僮多不祇給主可量聽行杖

增諸弟國封詔

大明五年

昔韓衛異姓宗周之明憲三封殊級往晉之令典惟皇家創典盡弘斯義朕應天命光宅四海思所以憲章前式崇建懿親永垂畫一著于甲令諸弟國封並可增益

千戶

答太子子業

廢帝見後

前廢帝幼而獨急在東宮每為世祖所責世祖西巡子業啓叅承起居書迹不謹上詰讓之子業啓事陳謝上又答之

書不長進此是一條耳聞汝素多懈怠獨戾日甚何以

頑固乃爾耶

宋書

答廬江王緯

南平王緯蚤薨子敬淵婚緯往視之白世祖借伎因答

婚禮不舉樂且敬淵等孤苦倍非宜也

封將帥功臣等詔

世祖伐逆定亂思將帥之功下詔

朕以不天有生罔二泣血千里志復深逆鞠旅伐罪義
氣雲湧羣帥仗節指難如歸故曾未積旬宗社載穆遂
以眇身猥纂大統永念茂庸思崇徽錫新除使持節散
騎常侍都督南充豫徐兗四州諸軍事鎮軍將軍南充
州刺史沈慶之新除散騎常侍領軍將軍柳元景新除
散騎常侍右衛將軍宗慤督兗州諸軍事輔國將軍兗
州刺史徐遺寶寧朔將軍始興太守沈法系驃騎咨議

參軍顧彬之或盡誠謀初宣綜戎略或受命元帥一戰
寧亂或稟奇軍統協規效捷偏師奉律勢振東南皆忠
國忘身義高前烈功載民聽誠簡朕心定賞策勲茲焉
攸在宜列土開邑永蕃皇家慶之可封南昌縣公元景
曲江縣公並食邑三千戶懋洮陽縣侯食邑二千戶遺
寶益陽縣侯食邑一千五百戶法系平固縣侯彬之陽
新縣侯並食邑千戶

追贈文帝王皇后母平樂鄉君詔

昔漢道既靈博平輝絕魏國方安嘉憲啓策皆因心所
弘酌典沿誥亡外祖親王夫人柔德淑範光啓坤載屬
內位闕正攝饋閨庭儀被芳聞問宣戚里永言感遠思
追榮秩宜式飭鴻則敬登徽序

又詔

趙蕭臧光祿袁敬公平樂郡君墓先未給塋戶加世數
已遠脣嗣哀陵外戚尊屬不宜使墳塋蕪穢可各給蠶
戶三以供灑埽

追贈張敷詔

敷父亡以毀卒
世祖即位詔贈

司徒故左長史張敷貞心簡立幼樹風規居哀毀滅孝
道淳室宜在追甄於以報美可追贈侍中

追贈王徽詔

徽棲志貞深文行惇洽生自華宗身安隱素足以貢茲
丘園惇是薄俗不幸蚤世朕甚悼之可追贈秘書監

答劉懷珍詔

懷珍孝建中以破魏功拜建武將
軍樂陵河間二郡太守明年啓求

還孝
武答

邊維須才未宜陳請

祭袁湛墓詔

大明三年幸籍田
行經湛墓下詔祭

故侍中左光祿大夫開府儀同三司晉寧敬公外氏尊
戚素風簡正歲紀稍積墳塋浸遠朕近廵覽千畝遙瞻
松隧緬維徽塵感慕增結可遣使祭少申永懷

祭殷景仁墓詔

大明五年行幸
經景仁墓下詔

司空文成公景仁德量淹正風識明允徽績忠謨夙達
先照惠政茂譽實留民屬近瞻丘墳感往興悼可遣使

致祭

卹賜徐湛之江湛王僧綽門戶詔

三人為元凶所殺世祖

並追贈又詔
三家長給廩

徐湛之江湛王僧綽門戶荼酷遺孤流寓言念既往感
痛兼深可令歸居本宅厚加卹賜

誅王僧達詔

僧達屢經狂逆上以終無悛心因
南彭城蕃縣民高閤謀反伏誅下

詔即其事陷
之於獄賜死

王僧達餘慶所鍾早登榮觀輕險無行暴于世談值國

道中艱盡室願效甄其薄誠貫其鴻慝爵遍外內身窮
榮寵曾無在泮食堪懷音乃協規西楚志擾東區公行
剽掠顯奪凶黨倚結羣惡誣亂視聽朕每容隱思加蕩
雪曾無犬馬感恩之志而炎火成燎原之勢涓流北江
河之形遂唇齒高閣契歸蘇寶搜詳妖圖覘察象緯
逮賊長臨臬餘黨就鞠咸布辭獄牒宣言虛市猶欲
隱忍法為情屈小醜紛紜人扇方甚矯構風塵志希非
覬固已達諸公卿昭于朝野朕焉得輕宗社之重行匹

夫之仁殛山誅邪聖典所同戮諷剪律漢法攸尚便可
收付廷尉肅正刑書故太保華容文昭公宏契濶歷朝
綢繆眷遇豈容忘茲勲德忽其世祀門爵國姻一不貶
絕

與東揚州刺史顏竣詔

竣字士遜瑯琊臨沂人延之子

建平王宏字休度文帝第七子謙儉周慎明
曉政事世祖甚信仗之歷為中書監尚書令
加散騎常侍薨痛
悼甚至與竣詔

宏夙情業尚素心令績雖年未及壯願言兼申謂天道

可倚輔仁無妄雖寢患淹時慮不至禍豈圖祐善虛設
一旦永謝驚惋摧慟五內交殞平生未遠舉目如昨而
賞對遊娛緬同千載哀酷纏綿實增痛切卿情均休戚
重以周旋乖圻少時奄成今古聞問傷惋當何可言

又詔

何偃字仲弘尚之中子子戢尚山陰
公主歷吏部尚書卒世祖與竣書

何偃遂成異世美志長往與之周旋重以姻媾臨哭傷
怨良不能已往矣宜贈散騎常侍金紫光祿大夫本官

如故

封劉延孫顏竣詔

朕藉羣能之力雪莫大之恥以眇眇之身託於王公之上思所以策勲樹良永寧世烈新除侍中領前軍將軍延孫率懷忠敏器局沉正協替義初誠力俱盡左衛將軍竣立志開亮理思清要茂策忠謨經綸惟始俾積基更造咸有勤焉宜顯授龜社大啓邦家延孫可封東昌縣侯竣建城縣侯食邑各二千戶

詔劉延孫

延孫彭城呂人

初高祖遺詔京口要地非宗室近戚不得居之大明初竟陵王誕為徐州上深相畏忌不欲使居京口遷之廣陵欲使腹心為徐州據京口以防誕故以南陵授延孫而與之合族大明三年詔延孫徵為侍中尚書左僕射

舊京樹親由來常準卿前出所有別議今此防久弭當以還授小兒

贈劉延孫詔

故侍中尚書左僕射領護軍將軍東昌縣開國侯延孫

風局簡正體識沉明綢繆心膺自蕃升朝契濶惟舊幾
將二紀靈業中圯則首贊出圖義令既舉則任均蕭冠
器允棟幹勲實佐時及累司馬兩官出內尹牧惠政茂
課著自民聽忠謨令節簡乎朕心方燮采台階永毗國
道奄至薨殞震慟兼深考終定典宜盡哀敬可贈司徒
給班劔二十人侍中僕射侯如故

賜劉延孫葬送詔

故司徒文穆公延孫居身寡約家素貧虛每念清美良

深悽歎葬送資調固當闕乏可賜錢三十萬米千斛

封龐秀之等詔

世祖入討元凶以伐逆寧亂事資羣謀大明元年下詔

昔歲國難方結疑懦者衆故散騎常侍太子右率龐秀之履險能貞首暢義節用使狡狀先聞軍備夙固醜逆時殄頗有力焉追念厥誠無忘於懷侍中祭酒顏師伯侍中領射聲校尉袁愍孫豫章太守王謙之太子前中庶子領右衛率張淹爰始入討預叅義謀契濶大難宜蒙殊報秀之可封樂安縣伯食邑六百戶師伯平都縣

子愍孫興平縣子謙之石陽縣子淹廣晉縣子食邑各五百戶

勞顏師伯詔

大明二年師伯節度諸將拒魏多所斬獲上嘉其功下詔

魏肆其憑陵規暴邊塞輔國將軍青冀二州刺史師伯宣略命師合變應機濟戍奮怒一月四捷支軍異部騁勇齊効頻臬名王大殲羣醜朕用嘉歎良深於懷可遣使慰勞并符輔國府詳考功最以時言上

答王元謨

元謨遷雍州刺史加都督雍土多僑寓元謨請上斷流民又令九品以上租使貧富相通境內嗟怨訛言元謨欲反時柳元景當權弟僧景為新城太守制令南陽諸郡竝發兵討元謨元謨令內外晏然以解衆惑馳啓孝武具陳本末帝知其虛馳遣主書吳喜公撫慰之又答書元謨性嚴未嘗妄笑時人言元謨眉頭未曾伸故帝以此戲之

梁山風塵初不介意君臣之際過足相保聊復為笑伸

卿眉頭

宋書

同前

南史

元謨啓明白之日七十老公反欲何求聊復為笑想足

以伸卿眉頭耳

同前

資治通鑑合
書史語為一

七十老公反欲何求君臣之際足以相保聊復為笑伸
卿眉頭耳

詔劉秀之

秀之字道寶穆之
兄歷雍州刺史

惠開思詔子徙御史中丞世祖
與秀之詔及在任百僚憚之

今以蕭惠開為憲司冀當稱職但一往眼額已自殊有

所震

並宋
書

追贈劉秀之詔

秀之歷寧蠻校尉雍州刺史
大明八年卒上甚痛惜下詔

秀之識局明遠才應通暢誠著蕃朝績宣累獄往歲臣
逆交構首義萬里及職司端尹贊戎兩宮嘉謀徽譽實
彰朝野漢南法繁民噉屬佇良牧故暫輟心膂外弘風
規出未踰期德被西服詳考古烈旅觀終始淳心忠聚
無以尚茲方式亮皇猷入衛根本奄至薨逝震慟于朕
心生榮之典未窮寵數哀終之禮宜盡崇飾兼履謙守
約封杜弗廣興言悼往益增痛恨可贈侍中司空持節

都督刺史校尉如故

顧寶先辭郎詔

寶先大明中為尚書水部郎父琛雖為左丞荀萬秋所劾至是

猶在職寶先自陳不拜世祖詔

敕違糾慢憲司之職若理有不自當更有釐正而自頃劾無輕重輒至私絕此風難長主者嚴為其科寶先益依附世准不足問

周朗徙邊詔

朗積忤旨為廬陵內史丁母艱每哭必慟其餘多不依常節大明四

年上使有司奏其居喪無禮請加收治詔徙寧州於道殺之

朗悖禮利口宜令剪戮微物不足亂典刑特鑕付邊郡

鄧琬擢給事黃門侍郎詔

琬父胤之初為世祖征虜長史歷光祿勳

琬二弟並以從臾質反敗誅琬時為南海太守在遠又有破蕭簡功得免復為丹陽丞大

明七年上幸歷陽追思蕃舊下詔

故光祿勳前征虜長史鄧胤之體局沉隱累任著績朕昔當藩重首先佐務心力款盡弗忘於懷往歲息璩凶悖自取誅翦公恩及琬特免釁戮今可擢為給事黃門侍郎以旌胤之宿誠

蕭惠開更授御史中丞詔

惠開入為侍中詔更授

惠開前在憲司奉法直繩不阿權戚朕甚嘉之可更授

御史中丞

贈卜天與詔

天與元嘉末為廣威將軍領左細仗元凶入獄事變倉卒天與執刀

持弓射賊劔于東堂幾中逆徒擊之倒地見殺世祖即位下詔

曰者逆豎犯蹕釁變卒起廣威將軍關中侯卜天與提戈赴難挺身奮節斬殪凶黨而旋受虐刃勇冠當時義侔古烈興言追悼傷痛於心宜加甄贈以旌忠節可贈

龍驤將軍益州刺史謚曰壯侯

贈卜天生詔

天與弟天生世祖時為龍驤將軍攻廣陵塞塹先登苦戰移日詔賜

天生始受戎任甫造寇壘而投輪越塹率果先騰驍壯之氣嘉歎無已可且賜布千匹以厲衆校

徵王素朱百年詔

世祖即位欲搜揚隱退乃下詔

濟世成務咸達隱微軌俗興讓必表清節朕昧旦求善思惇薄風琅邪王素會稽朱百年並廉約貞遠與物無競自足臯畝志在不移宜加褒引以光難進並可太子

舍人

高句驪王高璉進爵詔

大明七年

使持節散騎常侍督平營二州諸軍事征東大將軍高
句驪王樂浪公璉世事忠義作藩海外誠係本朝志翦
殘險通譯沙表克宣王猷宜加褒進以旌純節可車騎
大將軍開府儀同三司持節常侍都督王公如故

倭王世子興授爵詔

倭王濟之子興遣使
貢獻大明六年詔授

倭王世子興奕世載忠作藩外海稟化寧境恭修貢職

新嗣邊業宜授爵號可安東將軍倭國王

前廢帝

名子業小字法師孝武帝長子淫暴無道湘東王或弑之在位二年

即位詔

孝武大明八年閏五月崩太子即位六月詔

朕以眇身夙紹洪業敬御天威欽對靈命仰遵凝緒日
鑒前圖實可以拱默守成詒風長世而寶位告始萬寓
改屬惟德弗明昧於大道思宣睿範引茲簡恤可具詢
執事詳訪民隱凡曲令密文繁而作治關市僦稅事施
一時而姦吏舞文妄興威福加以氣緯舛立偏頗滋甚

宜其寬徭輕憲以救民切御府諸署事不須廣雕文篆
刻無施於今悉宜并省以酬氓願藩王貿貨一皆禁斷
外便具條以聞

舉才詔

景和元年永光
元年八月改元

昔凝神佇逸礪溪讚道湛慮思才傳巖岷化朕位御三
極風澄萬寓資鈇電斷正外斯戮思所以仰宣遺烈俯
弘景祚每結夢庖鼎瞻言板築有劬日昃無忘昧旦可
甄訪諸國招聘間部具有孝性忠節幽居遯棲信誠義

行廉正表俗文敏博識幹事治民務加旌舉隨才引擢
庶官克順彛倫咸叙主者精加詳括稱朕意焉

江夏王義恭錄尚書事詔

總錄之典著自前代孝建始年雖暫并省而因革有宜
理存濟務朕瑩獨在躬未涉政道百揆庶務允歸尊德
太宰江夏王義恭新除中書監太尉地居宗重受遺阿
衡實深憑倚用康庶績可錄尚書事本官監太宰王如
故侍中驃騎大將軍南兗州刺史巴東郡開國公新除

尚書令元景同稟顧誓翼輔皇家贊業宣風繫公是賴
可即本號開府儀同三司領兵置佐一依舊准領丹陽
尹侍中領公如故

手詔晉安王子勛

子勛孝武第三子

子勛加使持節時廢帝任凶多所誅宦前撫
軍諮議叅軍何邁少好武頗招集才勇之士
邁先尚太祖女新蔡公主帝詐云主薨殺宮人
代之而納主于後宮深忌邁邁謀因帝出行
為變迎立子勛事泄帝誅邁使八座奏子勛
與邁通謀又手詔子勛送藥賜死子勛起兵
以廢立為名太宗定
亂子勛號車騎將軍

何邁殺我立汝汝自計孰若孝武耶可自為其所

並宋書

同前

後魏書

聞汝與何邁謀共廢我汝自量體氣何如孝武尋當遣使送藥與汝

封譚金等詔

景和元年誅羣公金等並為之用帝下詔

屯騎校尉南清河太守譚金彊弩將軍童太壹車騎中參兵軍沈攸之誠略沈梁忠幹勇鷙消蕩氛翳首制鯨凶宜裂河山以酬勲義金可封平都縣男太壹宜陽縣

男攸之東興縣男食邑各三百戶

封袁顥徐爰詔

顥仕孝武時盛稱太子好學有日新之美及踐位深感之景和

元年遷為吏部尚書又下詔


宗社多故釁因冢司景命未淪神祚再又自非忠謀密契豈伊剋殄侍中祭酒領前軍將軍新除吏部尚書顥游擊將軍領著作郎兼尚書左丞徐爰誠心內款參聞嘉策匡贊之効實監朕懷宜甄茅社以獎義槩顥可封新隆縣子爰可封吳平縣子食邑各五百戶

敕巢尚之

戴法興會稽山陰人世祖時為中書通事舍人意任隆密凡遷選誅賞皆與法興尚書參懷廢帝即位法興遷越騎校尉執權日久威行內外然頗以直言忤上於家賜死敕尚之

吾纂承洪基君臨萬國推心勲舊著於遐邇不謂戴法興特遇負恩專作威福冒憲黷貨號令自由積釁累愆遂至於此卿等忠勤任事吾乃具悉但道路之言異同糾紛非惟人情駭愕亦玄象違度委付之旨良失本懷吾今自親覽萬機留心庶事卿等宜竭誠盡力以副所

期
宋書



宋文紀卷三